

Ba takhuh ka jingpule bad ki prokram ialehkai, leit kynduh CM ki nongialam ka MCA



U Secretary ka MCA uba dang aiti ia ka dorkhas ha u Myntri Rangbah kumjuh ha u Myntri ka tnad Sports. (Mawphor)

Shillong, Naiwieng 11 : Ki nongialam jong ka Meghalaya Cricket Association (MCA) ha

ka sngi Ba-ar ki la leit ban kynduh ia u Myntri Rangbah ka Jylla Conrad K Sangma ban

pypnaw ia ka jingsngewkhia na bynta ki khynnah ialehkai kriket ka jylla namar ka buh jingeh bha ia ki na ka jingiatakhuu ka jingpule khamtam ki eksam bad ki prokram ialehkai kiba la buh da ka Board of Control for Cricket in India (BCCI).

Haba iadei bad kane, na ka liang ka MCA hapoh ka jingialam u Honorary Secretary Bah Rayonald Kharkamni ki la aiti ruh da ka dorkhas ha u Myntri Rangbah ha ryngkat ka jingsakhi lang nongai buit jong u, Bah Hamletson Dohling ba dei ruh u President ka Meghalaya Football Association bad kumjuh u Myntri ka tnad Sports ka Jylla, Bah Wailadmiki Shylla.

Hadien ba la ioh ia ka jingpynshai, na ka liang u Myntri Rangbah, u kular ba un shim khia, kaban long kum shi bynta ban plie lad wat ia kiwei ki samla ialehkai.

Na ka liang ka MCA, ha

ka shithi kaba ki la ai sha u Bah Wailadmiki Shylla, ka pypnaw ba ki khynnah ialehkai kriket ba dang leit skul, ki donkam bha bunsien ban don ha ki prokram ia kilan bad hap ruh ban leit ia ialehkai shabar na ka jylla.

Kumta kane ka ju jia ryngkhat bad ka ia takhuh bha khah khah bad ka jingpule ka jong ki, khamtam lei lei ki eksamin jong ki Board, kaba bun na ki khynnah ki mad ban shem jingeh ban pynbiang lang ia kine ha ka juh ka por.

Kumta ha kane ka shithi, ka MCA ka kyntu ia ka sorkar ba kan shong pyrkhat ne ban ailad ia ki khynnah ban shong da kawei pat ka eksam kaba kyrpang ia kaba lah ban pynlong ia ki ha ki sngi bad ki por ba kham shadien.

Ia kane ka mat, ka MCA ka la pynsgew ruh sha ka tnat pule puthi, ba kan iarap ban shimkhia lem, ne ban da thaw syndon da ka mat treikam, kaban long kum shi bynta ban iarap ne ban kyrshan lem ia ki khynnah ba ialehkai kriket ha ka por ba ki mihkhmat ia ka jylla shabar na la iing.

Da ki jingialehkai ba harukom pynlong ka SSSM ba kynjoh 100 snem ka shnong Mawkyrwat

Shillong, Naiwieng 11 : Kum shibynta ban rakhe lehmen ia ka jingdap shispah (100) snem ka Shnong Mawkyrwat kaban sa ioh ban pynkut noh mynta u snem ha u bnai Nohprah, 2025, na ka liang ka Seng Samla Shnong Mawkyrwat kaba hapoh jong ka South West Khasi Hills District ha ryngkat bad ka Mawkyrwat Sporst Association ki la ioh ban pynlong ia ki jingialehkai bapher bapher kiba kynthup ia ka jingialehkai Football, Badminton, Basketball, Cricket, bad iakop ingi-um.

Ha kine ki jing ialehkai bapher bapher ka seng Samla Shnong ka la ioh ban pynkut noh ia ki jingialehkai mynta ka taiew bad ka la long shit, kaba iaid beiti iaid rytinh ha ka jingiaddon lang u bah Ktborsing Lyngdoh uba dei u President ka Seng Samla



Shmong Mawkyrwat bad u bah Elevenson Wanniang uba dei u Ex-President MASA kum u Kongsan ha ryngkat ki nongkitkam ka Seng Samla Shnong bad ka MASA. Ha ka jingialehkai Basketball jong ki Shynrang hapdeng ka Dong Riathawlong bad Dong Photsait typmew lajop da ka

Dong Riathawlong da 60 Basket la 55 Basket. Nangta, ha ka jingialehkai Cricket jong ki Shynrang la jop da ka Dong Mawbynna pyrshah ia ka Dong Mawkremsyiem da 27 run bad ha ka jingialehkai Football la jop da ka Dong Mawbynna pyrshah ia ka dong Mawkremsyiem da 1 - 0 kol ba

lathep da u Davidkupar Wanniang ha ka jingialehkai jong ka kyllamiet. La pyniaid ia ka jingsam khusnam da u Samla Afterson Wanniang uba dei u Secretary ka Mawkyrwat Sports Association bad la ioh ban sam ia ki khusnam da u kongsan bad u bah B.S. Marbianiang.

Khur takma rupa u Aishwary ha ka ISSF World Championships



Cairo, Naiwieng 11 : Ukhlor ialehkai Olympik ka Ri, u Aishwary Pratap Singh Tomar u la ioh ban khur ia ka takma rupa ha ka lypmung iakob siat 50m rifle hadien ba la lah ban pyniakhaid ia ka world record ha ka lypmung ialehkai jong ka ISSF World Championship kaba long ha kane ka sngi Baar.

Une u rangialehkai u la ioh ban siat haduh 466.9 point ban wan ha ka kyrdan kaba lai hadine u rangsiat

jong ka China u Yukun Liu uba la lah ban kot haduh 467.1 point tangba u tam pat ia u rangsiat ka France u Romain Aufrere da ki 454.8. Uwei pat u rangialehkai ka India u Niraj Kumar uba la poi sha ka final ha kane ka lypmung u la ioh ban wan ha ka kyrdan kaba san da ki 432.6 point. Shwa kane, u Aishwary uba don mynta ha ka rta kaba 24 snem u la ioh ban ia ryngkat bad ka world record ban rung sha final jong ka men's 50m rifle 3 positions jong katei ka lypmung.

U Aishwary u la lah ban siat haduh 597-40x ha ka jingiakhun ban iaryngkat bad ka world record katba u paralok jong u na ka ri u Niraj u la ioh rung lang sha ka final da ka jinglah ban kama haduh 592 point.

Yn pynlong biang ka KSU ia ka Khasi League T20 Cricket



Shillong, Naiwieng 11 : Kum shi bynta ban kyntiew ia ka jingialehkai Cricket ha ka jaidbynriew Khasi, ka Sports Committee jong ka Khasi Student Union (KSU) kan pynlong biang ia ka Maitshaphrang Khasi

League T20 Cricket Tournament 2025.

Kane kan dei ka wat ba lai lane ka 3rd Edition Maitshaphrang Khasi League T20 Cricket Tournament. Ia ka Cricket Tournament yn pynlong naduh 08 tarik haduh 20 tarik Nohprah mynta u snem.

Kane ka Tournament kan plie lad ia baroh ki samla Khasi kiba thrang ban kiew ha ka jingialehkai Cricket bad yn ailad kyrpang ia ki khynnah ba dang hapoh 19 snem bad 23 snem ka rta.

Ia Maitshaphrang Khasi League T20 Cricket Tournament yn pynlong ha 5 tylli ki madan ia lehka kata ha Urkaliar, Lawsohtun, Nongsder, Laitkor bad Polo.

Jurip u CM Conrad ia ka PA Sangma Sports Complex ban pynkhreh ia ka National Games



Shillong, Naiwieng 11: U Myntri Rangbah ka Jylla Conrad K Sangma ha ka taiew ba la dep ha ryngkat ka jingdon lang u Deputy Commissioner ka West Garo Hills, Vibhor Aggarwal lem bad kiwei kiwei ki heh Sorkar u la leit ban jurip ia ka PA Sangma Sport Complex kaba don ha Tura kaba ka jingpyntrei mynta ka dang iaid shakhmat.

Ha kane ka jingleit jurip u Myntri Rangbah u la shong bishar bniah ia ka jingtei jong ki bynta bapher bapher jong ka projek kynthup naduh ka Indoor Stadium bad Indoor Swimming Pool.

Haba kren ha kane ka sngi, u Myntri Rangbah u la iathuh ba ha ka jingjurip ia ka jingkyntiew ia ki bunjait ki jingialehkai ha rilum Garo baroh kawei.

ka la dep ban shna bad ka la treikam ruh mynta.

"Ha kane ka Complex kan don ruh ka Indoor Swimming Pool, Indoor Badminton, Basketball bad ka Volleyball Courts. Kane ka projek kan long ka jingkyrkhu ia ka thaiñ bad kan dei ruh shi bynta haka jingpynkhreh ia ka National Games 2027," u la ong.

U Myntri Rangbah u la pyntip ruh ba ka jingpyntrei ia kane ka projek ka dang iaid shaid shaid bad la khmih lynti ban pyndep noh ha u snem 2026.

Ka PA Sangma Integrated Sports Complex kadei ka Sports Complex ia kaba la saindur ha ka rukom kum kiwei ki Sports Complex ha kiwei ki ri jong ka pyrthei namar kin don bun tylli ki jingdonkam kynthup ka Football Stadium, Indoor Stadium bad Indoor Swimming Pool.

Kane ka Complex kan long kum ka jaka ba kongsan tam na ka bynta ka jinghikai, ka jingiakop, bad ka jingkyntiew ia ki bunjait ki jingialehkai ha rilum Garo baroh kawei.

Yn ialam u Vihann ia ka India U19 ha ka triangular series

New Delhi, Naiwieng 11 : U rangialehkai ba dang khie ka India u Vihan Malhotra ha ka sngi Ba-ar u la shah jied ban ialam kum u kapten ia ka kynhun ialehkai U19 A, ka India na ka bynta ka triangular series kaban kynthup lang ia ka India B kumjuh ka Afghanistan U19.

Ha kajuh ka por u Aaron George na Hyderabad un ialam ia ka kynhun ialehkai jong ka India U19 B, ha kane ka jingiakob kaban long ha BCCI's Centre of Excellence, Bengaluru, naduh ka 17tarik haduh 30 tarik Naiwieng.

India U19 A Squad: Vihaan Malhotra (C),

Abhigyan Kundu (VC & WK), Wafi Kachchhi, Vansh Acharya, Vineeth V.K, Lakshya Raichandani, A. Rapole (WK), Kanishk Chouhan, Khilan A Patel, Anmoljeet Singh, Mohamed Enaan, Henil Patel, Ashutosh Mahida, Aditya Rawat, Mohammed Malik.

India U19 B Squad: Aaron George (C), Vedant Trivedi (VC), Yuvraj Gohil, Maulyarajsinh Chavda, Rahul Kumar, Harvansh Singh (WK), Anvay Dravid (WK), R.S. Ambrish, B.K. Kishore, Naman Pushpak, Hemchudeshan J, Udhav Mohan, Ishan Sood, D Deepesh, Rohit Kumar Das.

Ha Abu Dhabi yn pynlong ia ka iew ia thied player na bynta ka IPL

New Delhi, Naiwieng 11 : Ka iew ia thied nongialehkai na ka bynta ka lypmung ialehkai jong ka Indian Premier League kan long ha Abu

Dhabi ha ki pdeng bnai jong u Nohprah mynta u snem, ong ki tyllong khubor na ka BCCI ha kane ka sngi Ba-ar.

Kan dei ka sien kaba lai lynter ba kane ka iew thied nongialehkai kan long shabar ri, hadien ka Dubai (2023) bad Jeddah (2024). La ong ruh ba kane ka iew ia die ia thied nongialehkai ka lah ban long ha ka 15 ne 16 tarik u Nohprah. "Ka Abhu Dhabi ka la shah jied ban long kum ka pdeng ban pynlong ia ka iew ia thied nongialehkai," bynrap biang ki tyllong khubor.

Shuh shuh la ong ba kane ka iew ia die ia thied nongialehkai kan long noh kaba kham rit lada nujor bad kaba long hau snem ba la dep ha Saudi Arabia.

Ryngkat u MLA ka thain, leit peit u CM ia ka jingshna ia ka madan artificial turf ha Ladjaplem



U Myntri Rangbah ka jylla, Conrad K Sangma katba u dang jurip ia ka madan artificial turf ha shnong Ladjaplem, Amlarem ha ka sngi Nyngkong. (Dur Mawphor)

Amlarem, Naiwieng 11 : U Myntri Rangbah ka Jylla Conrad K Sangma, ha ka sngi Nyngkong, u la leit ban jurip ia ka jingshna ia ka madan Artificial Turf ha ka shnong Ladjaplem kaba don ha Amlarem bad pypnaw ia ka jingluh ia ka jingiaid stet ka jingpyntrei ia kane ka projek. La synran ia u Myntri Rangbah da u MLA ka thain bad Myntri ka Tnad Pule Puthi Bah Lahkmen Rymbui lem bad ki Ophisar ka Tnad Sports, u District Sports Officer (DSO) ka West Jaintia

Hills Bad Khroobok Passah lem bad ki dkhot ka Amlarem Sub-Divisional Sports Association (ASSA). Ha kane ka jingjurip, u Myntri Rangbah u la ai ka jingiarih ia ka rukom shna bad rukom pynwandur ia ka madan phutbol haba pypnaw ba kum kine ki madan ialehkai la shna ruh ha kylleng ka Jylla hapoh ka prokram ka sorkar ban kyntiew ia ki kam ialehkai. Shuh shuh u la pypnaw ia ka jingkyrmen ba ka project kan sa dep noh shen

bad kan ai ka lad ia ki samla ka Amlarem bad ki jaka ba marjan ba kin kilan met ialade bad iashimbynta ha ki lypmung ialehkai ki ban sa pynbeit ha ka thain.

U Myntri Rangbah ula ban jur ruh ia ka jingkut jingmut jong ka sorkar ban pynshlur ia ki kam ialehkai, ban kyntiew ia ki samla bad pyniadonbynta ia ki shnong ki thaw, haba ban jur ba kum kine ki jaka ialehkai kin saindur ia ki sap bad pynkhlain ia ki kam ialehkai ha ka thain.



Ki rangialehkai ka Shillong Press Club (jersey rong saw thoh lieh) bad ki rangialehkai ka DIPR (jersey rong blue) ha ka jingialehkai paralok kum shi bynta ka jingrakhe ia ka National Press Day 2025 kaba long ha Madan Heh mini stadium, Mawlai ha ryngkat ka jingsakhi lang ki nongialam ka Shillong Press Club. (Dur Mawphor)